

RESOLUCIÓN DE APERTURA DO PRAZO DE SOLICITUDES PARA O EMPREGO DO PAVILLÓN POLIDEPORTIVO MUNICIPAL NA TEMPADA 2021-2022 (OUTUBRO A XUÑO)

A crise sanitaria xurdida en marzo de 2020 coa chegada o virus SARS-CoV-2 e as medidas adoptadas polas distintas autoridades sanitarias para acoutar a súa expansión, provocaron a limitación das nosas costumes e hábitos de vida, xerando unha paralización case absoluta da vida social comunitaria. Así, moitas actividades cotiás, quedaron suspendidas por completo en agarda da evolución da pandemia, entre elas, a meirande parte das actividades deportivas non profesionais, sendo quizais as máis severamente afectadas, o deporte base e a actividade deportiva colectiva non federada, que se viu limitada a grupos moi reducidos que imposibilitaban, e aínda na actualidade impiden, a formación de equipos en deportes de contacto tales como o fútbol, fútbol sala, baloncesto, etc.

Se ben dende o concello xa se iniciou este verán unha pequena programación deportiva para adultos, en grupos reducidos e sen contacto, con actividades de ioga, zumba e jumping que se desenvolveron no pavillón municipal, prorrogándose tamén a súa impartición durante o presente mes de setembro, a situación sanitaria actual, cunha porcentaxe de vacinación superior ao 70%, invita a retomar e/ou iniciar con prudencia outro tipo de actividades na medida e coas limitacións que a normativa sanitaria estableza en cada momento.

Neste contexto, o Concello de Barreiros está a preparar a reanudación das escolas deportivas municipais, dirixidas ás rapazas e rapaces de Barreiros, pero tamén é preciso que a poboación adulta siga tendo acceso ao deporte, tanto a través da programación municipal como da dos distintos clubs e asociacións deportivas do concello.

Para desenvolver este tipo de actividades o Concello conta principal e case unicamente co inmovible destinado a pavillón polideportivo municipal, que dispón seu propio protocolo de uso contido no o "Protocolo básico para a apertura de locais públicos do Concello de Barreiros tralo estado de alarma provocado pola crise sanitaria ocasionada pola COVID-19", cuxa última modificación foi aprobada por Decreto desta Alcaldía de data 19 de outubro de 2020. Esta instalación está suxeita, ademais, á Ordenanza reguladora da taxa pola utilización ou reserva de espazos públicos e inmoables de uso público no Concello de Barreiros, aprobada polo Pleno da Corporación en sesión de data 24 de novembro de 2014 e publicada no BOP de Lugo nº 22 de 28 de xaneiro de 2015. Esta normativa establece, entre outras disposicións, que "a realización de actividades de carácter non lucrativo ou as organizadas polo concello, sempre terán preferencia á hora de obter a autorización dun determinado espazo municipal", asemade que "están obrigados ao pago da presente taxa as persoas e entidades con ánimo de lucro que soliciten a utilización das instalacións, espazos ou inmoables e quen as utilice de forma privativa ou con aproveitamento especial aínda sen teren obtido a preceptiva autorización", e que "non están obrigadas ao pagamento de cantidade algunha as actividades ou actos de calquera índole, organizadas polo Concello de Barreiros ou por entidades e asociacións sen ánimo de lucro ou persoas físicas, sempre e cando as mesmas non busquen unha finalidade lucrativa, directa ou indirecta, ou expectativas de carácter económico. O concello poderá declarar de forma motivada, unha actividade, en principio lucrativa, como de interese xeral, polos valores ou a utilidade xeral que a mesma poda ter para os veciños/as do municipio."

Tendo en conta o anteriormente exposto e considerando a existencia e necesidades dos distintos clubs, asociacións ou colectivos de carácter deportivo de Barreiros, ao obxecto de procurar o acceso de todas elas ás instalacións dispoñibles, en virtude da autoridade que me confire a lexislación vixente, **RESOLVO:**

PRIMEIRO.- Abrir un período para a presentación de solicitudes para o emprego e/ou reserva do pavillón polideportivo municipal durante a tempada 2021-2022 (do 1 de outubro de 2021 ao 30 de xuño de 2022), comprendido entre o 6 e o 24 de setembro, ámbolos dous inclusive. Durante este prazo os interesados deberán presentar nos rexistros municipais (presencial ou electrónico) a súa solicitude no modelo normalizado que se lles facilitará nas oficinas xerais e que tamén poderán obter na páxina web do Concello de Barreiros (www.concellodebarreiros.gal) no que se indicarán, ademais dos datos da entidade ou persoa solicitante, a actividade para a que se solicita, a preferencia de días e horario e o número de participantes, así como o protocolo de prevención contra a COVID19 que aplicarán durante o desenvolvemento da actividade e a persoa responsable do seu cumprimento.



SEGUNDO.- Determinar que unha vez recibidas todas estas solicitudes, polo Concello fixarase un calendario de uso da instalación establecendo a seguinte orde de prioridade:

- actividades organizadas ou promovidas polo propio concello, con preferencia daquelas que promovan o deporte de base
- actividades promovidas por clubs ou entidades barreirenses que desenvolvan actividade competitiva
- entidades asociativas barreirenses sen ánimo de lucro
- outros colectivos sen ánimo de lucro

No caso de quedar horas dispoñibles, poderá asignarse o seu uso puntual a colectivos sen ánimo lucrativo non constituídos formalmente.

TERCEIRO.- Non obstante ao establecido no anterior parágrafo, o Concello garantirá que todas aquelas entidades deportivas ou colectivos sen ánimo de lucro solicitantes, que teñan a súa sé social ou domicilio neste termo municipal, teñan dereito ao uso do pavillón durante a tempada 2021-2022, para o cal, unha vez elaborado o calendario de uso da instalación este será consensuado con todas as entidades solicitantes.

Sen prexuízo do anterior, o Concello reservarase o dereito a modificar o calendario ao longo da tempada en función do seu uso efectivo ou por outro tipo de razóns xustificadas, en cuxo caso, se poría novamente en coñecemento de todos os usuarios e usuarias.

Asinado dixitalmente na data que figura á marxe pola alcaldesa-presidenta do Concello de Barreiros, Ana Belén Ermida Igrexas, ante a secretaria-interventora, Begoña Teijeiro Campo.

